

17.03.2014.



Upravni odbor Udruženja poslodavaca BPK Goražde u petak 14.03.2014.godine održao je svoju 30.redovnu sjednicu na kojoj se našlo sedam tačaka dnevnog reda.

Nakon usvajanja Zapisnika sa prethodne sjednice raspravljao se finansijski izvještaj Udruženja sa pregledom prihoda i rashoda za 2013.godinu. Ocijenjeno je da se mora intenzivirati naplata članarine koja je još uvijek kao izvorni prihod Udruženja nedovoljan za izmirenje svih obaveza koji se stvore, te je stoga Udruženje poslodavaca primorano tražiti dodatna finansijska sredstva iz Budžeta kantona i općine Goražde.

Upravni odbor se u nastavku sjednice osvrnuo na trenutnu političku krizu u kantonu i Federaciji BiH.

Upravni odbor ukazuje na realne probleme privrede, te među glavne probleme na putu razvoja svrstava još uvijek nedovoljno dobar poslovni ambijent koji je uzrokovan neadekvatnim zakonskim rješenjima, a posebno Zakona o radu koji je preduslov za dolazak investitora, Zakona o privrednim društvima, Zakon o javnim nabavkama BiH, Zakon o PDV-u te opterećenosti privrede raznim fiskalnim i parafiskalnim nametima.

Takođe, Upravni odbor smatra da je na području BPK Goražde umnogome zapostavljen tercijalni sektor (trgovina, usluge i dr.) koji je u teškom stanju, jer se po pitanju podsticaja dešava da po deset godina neki privredni subjekti nisu dobili nikad podsticaja za nabavku osnovnih sredstava ili slično. Udruženje poslodavaca će tražiti od Vlade kantona da posveti više pažnje ovih granama privrede.

Upravni odbor se informisao o održanim sjednicama Ekonomko-socijalnog vijeća između dvije sjednice i zaključeno je da Udruženje poslodavaca aktivno učestvuje u ovoj instituciji i sa svojim prijedlozima daje doprinos u donošenju Zakona, Budžeta te drugih propisa koji se nađu na dnevnom redu sjednica.

Na dnevnom redu se takođe našla tačka dnevnog reda priprema oko održavanja 8.Izvještajno-izborne Skupštine Udruženja poslodavaca.Utvrđeni su prijedlozi Izvještaja o radu Udruženja za 2013.godinu Programa rada za 2014.godinu, Finansijskog plana za 2014.godinu, te prijedlog za izmjenu Statuta.

Datum održavanja Skupštine će biti prolongiran kako je bio prvobitno planiran za 27.03., dok nepristignu prijedlozi za kandidate u Upravni odbor Udruženja, nakon čega će biti imenovana Kanidaciona komisija koja će predložiti Skupštini devetočlani Upravni odbor te druge organe

upravljanja, a na osnovu kriterija koje definiše Upravni odbor.

Tehnička služba